

## **Inatsisartut ilassutitut aningaasaliissutitut inatsisissaannut siunnersuut 2024**

(Aningaasaqarneermut Akileraartarnermullu Naalakkersuisoq)

(Siullermeerneqarnera)

Ukiumoortumik ilassutitut aningaasaliissutitut inatsisissami ersersinneqarput aningaasartuutit, ukiumi tassani siumut pilersaarusiorneqareersimanngitsut. Allatut oqaatigalugu aningaasat, atorneqareersimasut, aammalu taamaattumik sunniuteqarsinnaajunnaareersimasut piffissami, inatsisartut piumasarineqartutut ilassutitut aningaasaliissutitut suliaqarnerannut akuersinerannullu.

Demokraatinut pingaarnerpaavoq, aningaasatigut akisussaassuseqarnerup ukkatarijuarneqartarnissaa – aamma missigersersuusiornermut tunngatillugu. Paasivarputit, ukiup ingerlanerani naatsorsuutigineqarsimanngitsunik aningaasaliissutissanik takkuttoqariataartarnera, tamannalu pissusissamisoorpoq. Ileqquliutiinnarneqassanngilarli, ilassutitut akuersissutit ukiut tamaasa qaffakkaluttuinnartinnissaat aammalu aningaasaqarnermi aalajangersimasutut isigineqartutut ittarneri.

Taamaattumik Demokraatit Naalakkersuisut kajumissaassavaat ukiup ingerlanerani ilassutitut akuerineqarnissamik qinnuteqarnissaq pakkersimaaqqullugu. Sakkortuumik erseqqissassavarput, Naalakkersuisuniit ilassutitut akuereqqulluni qinnuteqaatit tamarluinnarmik aningaasartuummik, naatsorsuutigineqarsinnaasimanngitsumik, tunngaveqassammata.

Neriutigaarput, amerlassutsimikkut aningaasartamikkullu ilassutitut aningaasaliissutissatut qinnuteqaatit sapinngisamik annikinnerpaamiitinneqarnissaat.

Taamatut oqaaseqarlunga nalunaarutigissavara, Demokraatit siunnersuut una akuereqqullugu innersuukkipput aammalu Aningaasaqarneermut- aamma Akileraartarnermut ataatsimiititaliami aappassaaniinnginnerani oqaluusereqqitassatut innersuullugu.